

## REES, BOWEN (1857 - 1929), cenhadwr

**Enw:** Bowen Rees  
**Dyddiad geni:** 1857  
**Dyddiad marw:** 1929  
**Prïod:** Susannah Wesley Rees (née Davies)  
**Rhiant:** Margaret Rees (née Bowen)  
**Rhiant:** Jacob Rees  
**Rhyw:** Gwryw  
**Galwedigaeth:** cenhadwr  
**Maes gweithgaredd:** Crefydd  
**Awdur:** Ioan Bowen Rees

Ganwyd 16 Mawrth 1857, yn nhafarn yr Ivy Bush, Llandybie, Caerfyrddin, yr ieuegaf o chwe phlentyn Jacob Rees, saer maen, a'i wraig Margaret, merch y tafarnwr Richard Bowen. Symudodd y teulu i Ystalyfera, Morgannwg, a dechreuodd weithio mewn gefail yn naw oed. Yn 1874, ar ôl clywed anerchiad gan **Thomas Morgan Thomas**, 'Thomas Affrica', rhoddodd ei fryd ar y genhadaeth. Wedi cyfnod yng Ngholeg y Bala (1880-84), ordeiniwyd ef ym Mhant-teg (A), Ystalyfera, 22 Mai 1884 a'i anfon gan Gymdeithas Genhadol Llundain i Lyn Tanganyika. Yn dilyn cwrs brys yn ysgol feddygol Prifysgol Caeredin, trosglwyddwyd ef i wlad yr Ndebele, gan ymsefydlu yn Inyathi ym Mawrth 1888 : rhwng 1892 ac 1918 Susanna Wesley (Davies gynt) ei wraig (y soprano Llinos Morgannwg, ganwyd Merthyr Tudful 5 Gorffennaf 1863, yn ferch i weithiwr haearn, bu farw Abertawe 9 Ebrill 1933) ac yntau oedd yr unig genhadon yno - hithau hefyd o Ystalyfera ac yn pregethu ar ei chylchdaith E.F. er yn 22 oed. Pridwyd hwy yn Capetown 9 Mawrth 1890 : ganwyd iddynt saith o blant ond collwyd tri yn ifanc yn Inyathi. A'r Brenin Lobengula (a'i olynwyr) wedi arbed eu bywydau wrth i Brydain ymosod ar ei wlad yn 1893, eu heithrio o'r gyflafan ar ddechrau Gwrthryfel 1896, a dal i'w cefnogi wedyn, bu cryn lewyrch ar eu cenhadaeth dros ardal o faint Dyfed. Ceisiodd Bowen Rees amddiffyn yr Ndebele rhag rhaib y British South Africa Co. : rhoddodd wybodaeth i'r Crynwr, John Ellis A.S., aelod o'r Pwyllgor Ymchwil i'r Jameson Raid, a thystiolaeth i'r Aborigine Protection Society ar gyfer achos cyfreithiol a benderfynodd, yn 1918, nad oedd gan y cwmni hawl i dir yr Ndebele. Yr oedd yn nodedig o ryddfrydig ei safbwynt gan alluogi'r Ndebele i dderbyn yr efengyl a'r addysg newydd heb droi cefn yn llwyr ar yr hen draddodiad: priodolir y ffaith fod yr Annibynwyr yn dal yn rym yn eu plith i'w agwedd ef a Susanna, yn ogystal ag i'w gwasanaeth maith. Penodwyd Bowen Rees yn athro yng ngholeg hyfforddi pregethwyr Tiger Kloof ger Vryburg, De Affrica, yn 1918 ond ymdeolodd i Abertawe yn 1922 a bu farw yno ar 7 Mawrth 1929 a'i gladdu yn Ystumllwynarth, Morgannwg.

### Awdur

**Dr Ioan Bowen Rees**, (1929 - 1999)

### Ffynonellau

D. G. Williams, *Y Parch. Bowen Rees, Pant-teg ac Affrica* (London c.1939) (c. 1939)

*Y Tyst*, 14 Mawrth 1929

*Y Cymro*, 10 Ebrill, 1929

*Y Gwilyedydd Newydd*, 27 Ebrill 1918

N. Bhebe, *Christianity and Traditional Religion in Western Zimbabwe, 1859-1923* (London 1979)

Marieke Clarke, 'Land, Missionaries and the Road to the North; aspects of the origins of the Nkayi District, 1893-1918'

Terence Ranger, 'Violence and Memory: Zimbabwe, 1896 to 1996 ', *Zimbabwe Review*, 96 (1995), 5-7

Joan Bowen Rees, 'Surviving the Matabele Rebellion', *Planet*, 120 (1996-97), 82-91

'Cenhadon olaf Lobengula', *Y Tyst*, 1, 8 Awst 1996

gohebiaeth yr LMS yn llyfrgell SOAS, Llundain

gwybodaeth bersonol a llawysgrifau teuluol, rhai ohonynt yn Archifdy Gwynedd, Caernarfon

### Dolenni Ychwanegol

Wikidata: Q20821092

**Dyddiad cyhoeddi:** 1997

**Hawlfraint Erthygl:** <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

Preifatrwydd a Chwciis  
Hawffraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Yn ddiwedd  
Llywodraeth Cymru  
Supported by  
Welsh Government